

PANORAMA

Weekblad bergambar dalem bahasa Blanda dan Melajoe.

Di bawah pimpinan

LIEM KOEN HIAN

Kantor:
STADHUISPLEIN 41

8 AUGUSTUS 1936

Taon X No. 31

Pakerdjaän sama-sama antara Tiongkok dan Geneve dalem kalangan techniek

Oleh: TZE-HSIUNG KUO.

(Dari „Information Bulletin”, panerbitan Council of International Affairs, Nanking).

III.

„Methode-methode bakerdja. — Pamoedjihan2 (recommendations) dan poetoesan2 dari National Economic Council, djikaloe soeda ditrima baek oleh Pamerenta, aken dikirim pada Permanent Technical Secretariat boeat didjalanken. Ini Secretariat berwadjib aken minta bantoean saloewasnja pada pendirian2 jang ada terdapet, jaitoe National Research Institute sekalian tjabang-tjabangnya, dan itoe berbagi universiteit nationaal dan particulier serta instituut2 speciaal.

„Boleh djadi ada lebih mengampangken djikaloe Secretariaat itoe mempoenjai satoe kantor tjabang di Shanghai, pada siapa anggota2 itoe Council bisa berhoeboengan.

„Berbagi sub-committees jang hendak didiriken dalem ini pertemoean diharep aken soeka lantas moelai bekerdja agar sigra bisa madjoeken laporan pada Council tentang kemadjoean2 jang tertjapei dalem pakerdjaan.

„Begrooting. — Penaksiran2 tentang ongkos pakerdjaan National Economic Council hanja bisa dilakoeken pelahan2 berbareng dengen madjoenja pakerdjaan.

„Ini waktoe perloe didapet crediet boeat Per-

manent Technical Secretariaat aken manouetoep ongkos dari itoe berbagi panjelidikan jang dilakoe-ken oleh kita poenja achli2 sendiri dan achli2 asing, lebih djaoeh boeat pakerdjaan Central Field Health Station dan perbaikan2 pendidikan ilmoe-perobatan sebagimana jang soeda dioereiken dalem Plan Tiga Taon.”

Plan Sapoeloe Taon.

Rentjana kadoea adalah satoe Plan Sapoeloe Taon jang diatoer oleh Pamerenta Tionghoa dengan bakerdja sama2 Volkenbond dan dimahloem-ken tanggal 17 Augustus 1931. Plan tersebut terdiri dari 14 punt dan diberikoeti dengan penaksiran tentang ongkos-ongkosnya :

- (1) Bikin pelabuhan, kanaal, djalan dan spoor dan djalan rajah.
- (2) Oesahaken daerah2 loewas jang belon dioesahaken di Oetara-barat dan madjoeken industrie pertanian di saloeroe Republiek.
- (3) Madjoeken parit2 dan soember2 alam laennja.
- (4) Mendiriken fabriek2 perleboeran berhoeboeng dengan industrie2 logam.

- (5) Produceer besi dan wadja.
- (6) Membikin bata-bata, cement dan laen2 mate-rial pranti mendiriken roemah.
- (7) Membikin locomotief dan wagon2.
- (8) Membikin kapal2 dagang dan kapal2 penang-kepan ikan.
- (9) Membikin segala types kandaran.
- (10) Madjoeken industrie coal-tar.
- (11) Madjoeken basis-industrie.
- (12) Madjoeken hydro-electric systeem dan diriken central power stations.
- (13) Membikin masin2 electrisch.
- (14) Mendjalanken pakerdjaan soeloeran aer (wa-ter works).

Menoeroet itoe plan ada diniat boeat bikin 8.000.000 tons kapal2 dagang, mendiriken satoe fabriek besar jang bisa lever totaal 20.000.000 h.p. tenaga-panjeroeng bagi industrie-industrie; produceer 120.000.000 ton besi dan wadja dan 2.200.000.000 ton areng; atoer pangoesahaan dari 300.000.000 acres tanah pertanian jang soeboer dan pakerdjaken 36.000.000 pekakas tenoen jang baroe.

Ongkos mendjalanken ini rentjana ditaksir kira-kira \$ 3.100.000.— Menoeroet suggestie, Tiongkok akan sediaken kira \$ 600.000.—, salebihnya akan didapet dari oewang Boxer Indemnity jang hendak dikombaliken oleh Groot Brittanie.

Ini rentjana ada lebih loewas dari pada ren-tjana jang pertama dan boleh djadi lantaran loear biasa loewasnja, maka belon ada diambil tindakan apa-apa boeat mewoedjoetken itoe.

Hasil Technical Co-operation.

Sekalipoen adanja berbagi kasoekeran, seperti-nja bintjana alam, kakoesoetan dalem negri dan laen2. Pamerenta Tionghoa soeda berhasil djalan-ken ia poenja pakerdjaan pembetoelan dengen bak-erdja sama2 Volkenbond. Hasil2 jang tertjapei oleh National Economic Council ada mengasih pengha-repan baek sekali dan ringkesnja bisa dioereiken seperti berkoet :

Prikasehatian.

Sadjek diangkatnja Dr. J. Heng Liu sebagai Di-rector dari National Health Administration, telah diakoe bahowea „Pamerenta Nationaal di Nanking telah toemplek perhatian lebih besar pada prika-sehatan rahajat sedari didiriken dari pada pam-erenta mana poen di Peking selama tempo-berdiri-nja”.

Dalem boelan April 1931 National Health Ad-ministration telah atoer satoe program boeat madjoeken Central Health Service dalem tempo tiga taon,

program mana telah dibertaoeken pada Commissie-Kasehatan dari Volkenbond dalem boelan Mei 1931. Ini ada mendjadi dasar dari itoe coöperation jang actief dan jang berdjalanan troes-meneroes antara National Service dan itoe Organisatie Internatio-nal. Punt2 penting dari itoe plan tiga taon adalah pendirian Central Field Health Station, satoe Expe-riental Medical School, perloewasan dengen pela-han2 dari National Quarantine Service dan coördinatie dari itoe berbagi poesat activiteit prikase-hatan jang modern di dalem negri.

Quarantine Service.

Quarantine Service di Tiongkok doeloe dioeroes oleh Chinese Maritime Customs di bawah panilikan Ministerie van Financien. Sebagi kasoedahan dari rapportnja Dr. C. L. Park pada Commissie Prikase-hatan Volkenbond, telah diambil poetoesan boeat pindahken itoe dienst di bawah panilikan Ministe-rie Prikasehatan, sekarang National Health Admini-stration. National Quarantine Service diboeke dengan formeel dalem boelan Juli 1930 di bawah pimpinan Dr. Wu Lien Teh dengan kantoran cen-traal di Woosung. Lebih djaoeh ada delapan kan-tor locaal, jang menanggoeng djawab terhadep kantoran centraal, jaitoe di Shanghai, Tsingtao, Amoy, Tientsin, Taku, Tangku, Wuhan dan Ching-wantao dengen djoemblah pendoedoek totaal 5.862.748 djiwa. Pakerdjaan senantiasa bertambah loewas dan itoe dienst poen toeroet diluwaskken dengen pakerdjaken lebih banjak achli jang terdi-dik baek. Itoe dienst mamegang panilikan di Swatow, Canton, Chefoo, Wei-hai-wei, Antung dan New-chuang. Dengan terlepasnja Manchuria, doea tem-pat jang terseboet paling belakang tida lagi berada di bawah panilikan Tionghoa.

Selama taon 1932 totaal ada dilakoeken pa-preksahan di 2.205 kapal, 733 kapal diasepin dengen welirang dan pakerdjaan sama2 jang rapet ada tertjipta antara itoe berbagi afdeelingen. Boeat pertama kali, afdeeling panjelidikan dari itoe Service telah lakoeken pemahaman tentang koetoe tikoes. Djoega itoe Service telah bakerdja sama-sama da-lem hal membantras wabah cholera dan memberi bantoean pada orang2 jang manjingkir ka Shang-hai.

Tanggal 1 Juli 1931 telah dimahloemken sa-prangkat pelatoeran baroe berdasar atas practijk modern. Oemoemnja itoe ada bersatoedjoean de-nen panetepan International Sanitary Convention dari taon 1926. Selaennja itoe, lima officier quarantaine Tionghoa dikirim ka loear negri boeat paham-ken practijk prikasehatan oemoem di sadjoemblah kota-pelaboean di Europa dan Amerika Sariket.



Memboeka djalan di pagoenoengan „Col du Galibier”, Frankrijk, tingginja 2.600 M., di mana orang2 jang toeroet ambil bagian dalem balapan sepeda „Tour de France” moesti liwat.

Central Field Health Station.

Central Field Health Station moelai lakoeken pakerdjaan dalem ia poenja kantoran boeat samentara wakto sedari 1931 dan telah didiriken dengen formeel dalem boelan September 1932 sebagai technical medical organization dari National Health Administration dan National Economic Council. Dengan bakerdja sama2 achli Volkenbond telah diatoer satoe plan boeat itoe station, jang aken dipetjah djadi 9 afdeeling :

- (a) Laboratoria dan Panilikan Wabah Penjakit.
- (b) Parasitology.
- (c) Pendjagaan kasehatan (sanitation).
- (d) Pertoeloengen obat dan Social Medicine.
- (e) Kabondaän (Maternity) dan Prikasehatan Anak2.
- (f) Prikasehatan dalem sakolahan.
- (g) Prikasehatan dalem kalangan industrie.
- (h) Statistieken tentang wabah penjakit dan laen2 statistieken penting.
- (i) Pendidikan prikasehatan dan pendidikan prikasehatan bagi rahajat.

Sedari moesin zomer dari 1930 Dr. B. Borcic, bekas director dari State Institute of Hygiene di Zagreb, telah ditempatken di Nanking sebagai achli dari Volkenbond goena memberi advies2 technisch

selama tempo-permoelaan dari itoe organisatie dan boeat madjoeken itoe station. Bandir dari soenggi Yangtse dalem taon 1931, wabah cholera dalem taon 1932 dan banjak matjem oerosan lagi di berbagi provincies dan gemeente telah „dibersken” oleh itoe station.

Central Hospital.

Central Hospital dimoela dalem boelan Januari 1930. boeat samentara waktao dalem adegan2 denga dingding kajoe. Plan boeat diriken satoe gedong jang pasti telah ditrima baek dalem moesin semi dari taon 1931 dan sasoedanja pendirian itoe rampoeng, klinik terseboet diboeuka dalem boelan Juni 1933. Dalem itoe roemah sakit bisa disediaken 340 pembaringan. Ongkos totaal dari itoe hospitaal, berikoet peralatannja, adalah \$ 1.200.000.— Itoe hospitaal diongkosin oleh Pamerenta dan berlakoe sebagai poesat pendidikan bagi personeel perobatan.

Chekiang adalah provincie jang menjampei kemadjoean paling pesat dalem prikasehatan oemoem. Soepaja itoe provincie bisa digoenaaken sebagai toeládan, maka dienst prikasehatan di sitoe telah dibriken sokongan. Pamerenta itoe provincie ada mempoenjai niatan boeat diriken satoe hospitaal di Hangchow, jang bisa moewat 400 pembaringan, dan sekalian díprantiken sebagai poesat pendidikan.

Boeat Goenanja Ihoe.....

Satoe tjerita Tionghoa dari
JU BIEN MING

(Salinan merdika dari China Press Weekly: „His Mother's Funeral”).

(Samboengan Panorama No. 30).

„Tjoema satoe,” djawab Ah-fu. Sekarang itoe anak soeda beroesia ampir sapoeloe taon. Tempo iboenja maninggal, ia baroe beroesia tiga taon, lantas ia dirawat oleh iboekoe. Ay, djikaloe akoe inget kamatiian istrikoe, maka akoe beringin sekali lakoe-ken pembalesan.”

Ia angkat kepelannja dan antjoengken itoe.

„Sabar, sabarlah,” peringeti ia poenja sobat, „djangan djadi sengitan”.

III.

Rerotan pangoeboeran itoe telah mangasoh doe-loe sabelonnja teroesken perdjalananja. Di pinggir jalanan di sitoe ada mangalir satoe solokan dengen aer jang djernih. Itoe koeli2 jang pada kepanasan dan keaoesan pada berseraboetan memboeroe itoe aer. Ada jang goenaken marika poenja kadoea tangan boeat sendok itoe aer aken diminoem, ada djoega jang sedot itoe aer dengen marika poenja moeloet sembari bongkokin badan.

Djoega Ah-fu dan sobatnya tatoeroetan minoem. Apabila marika poenja aoes soeda ilang, iaorang pisahken diri dari jang laen2 dan doedoek di bawah papoehoenan.

Ah-fu isih iapoenja pipa, jang ia gantoeng di pinggang, dengen tembako dan moelai isep itoe, sedeng ia poenja sobat rebah di atas roempoet sembari kipas-kipasin dirinja dengen ia poenja topi.

Achir2 Ah-fu jang moelai bitjara.

„Tjoba akoe tida inget anakkoe, tentoe soeda lama akoe boenoeh padanja dan bales sakit hati,” ia berkata.

„Tentang siapakah kaoe bitjara?” menanja sobatnya sembari berdoedoek dan mengawasin dengen heran.

„Tentang siapa lagi, djika boekan tentang itoe orang jang telah sesatken istrikoe?”

Mendadak ia pelahanken ia poenja soeara bitjara dan berkata: „Ini ada satoe rasia, djangan bilang pada siapa-siapa.”

Kamoedian Ah-fu berdehem dan lantas moelai tjerita:

„Akoe tinggal di sini sasoedanja menikah tiga

taon. Akoe sewah sapotong tanah dari itoe orang hartawan, itoe orang jang berlakoe sebagai satoe anak berkakti. Istrikoe baroe bersalin maka ia sannantiasa tinggal di roemah.

„Akoe bakerdja, sakerasnja bisa, moelai matahari terbit sampe matahari silem di itoe tanah pertanian. Iboekoe itoe waktoe tinggal di kita poenja roemah jang lama di Anhwei.

„Di achir taon pertama bisalah akoe manjimpen tjoekcep oewang boeat bajar itoe oewang sewahan jang sabernerna ada terlaloe tinggi.”

Sabelonnja ia bisa teroesin tjeritanja, satoe se-roehan telah terdenger: „He, kaoe, pemales-pemales, sekarang soeda laat, hajo kita djalan lagi!”

Ah-fu ketroekein ia poenja pipa, bangoen dengen ogah-cgahan bersama sobatnya dan ambil marika poenja tempat jang tadi di antara itoe 64 penggotong peti.

Sekalipoen itoe waktoe soeda liwat tengahari, jaitoe kira djam tiga atawa ampat, toch sinar matahari masih sadja panas. Rerotan jang pandjang itoe bergerak lagi.

Ah-fu poenja sobat ingin sekali denger teroesan ja itoe tjerita, maka ia menanja dengen pelahan: „Bagimanakah teroesannja itoe tjerita?”

„Istrikoe,” berkata Ah-fu berslang sesa'at, „sekalipoen ada asal padesa'an, ada satoe prampoean jang tjantik djoega. Seperti akoe soeda tjerita, kita poenja keada'an di panoetoep taon pertama ada baek djoega dan kita bisa bajar itoe sewahan. Aken tetapi di taon kadoea kita tida mengalamken keada'an begitoe baek. Oedjan ada terlaloe banjak dan kita poenja panen telah roesak. Itoe waktoe kaoe belon ada di sini.”

Ia batoek lagi dan boewang loedah. Laloe ia mangelah napas dan teroesken tjeritanja: „Itoe toeuan roemah lantas dateng dan minta oewang sewahan. Tentoe sekali akoe tida bisa bajar. Selagi akoe minta tempo padanja, istrikoe telah kaloeear dan mejamperin akoe. Roepanja toeuan roemah merasa ketarik oleh parasnja akoe poenja istri. Ia berlaloe dengen zonder memaksa minta oewangnya, aken tetapi moelai itoe tempo ia tida taoe minta oe-

wang sewah, hanja maen genit-genitan dengen istrikoe. Ia taoe bahoea akoe ada saorang jang djoedjoer dan istrikoe ada satoe prampeoan jang berhati soetji. Maka ia kirim akoe ka tempat djaoeh dengen membawa satoe prentah, perdjalanan mana paling sedikit mengambil tempo 14 hari. Akoe dapat firasat tentang ia poenja maksoed tida baek, tapi akoe tinggalken djoega istrikoe maski dengen perasa'an berat. Waktoe akoe kombali, istrikoe sakit keras. Ia toe-broek padakoe tatkala akoe menjamperin ia poenja pembaringan dan menangis begitoe sedi, sebagimana jang belon perna akoe menampak. Achir2 ia bilang: 'Dia dateng.....' Akoe lantas mangarti. Dan menda-dak djadi beringas. Pikiran pertama jang masoek di otakkoe adalah membikin pembalesan, tapi sa-koenjoeng2 akoe inget akoe poenja anak jang tjoe-ma samenggah-menggahnja....."

Ah-fu tida bisa tahan lagi kadoekahannja. Ia loepaken itoe hawa oedara jang panas. Ia malah ber-gcrometer sakoedjoer badan, saolah-olah kadinginan.

Itoe sobat, jang berpangawakan besar, mendengerin dengen penoeh perhatian dan tida bisa kata apa-apa. Ia tida bisa dapetken satoe perkata'an boeat hiboerken pada sobatnya itoe.

Sakoenjoeng-koenjoeng satoe anak lelaki ketjil lari terbirit-birit menjamperin dari seblah belakang sembari berseroe sakerasnja: „Tia-Tia !”

Ah-fu kenalin itoe soeara, maka ia berbalik, mengawasin itoe anak dan berkata saolah-olah manjomelken: „Ah, Hsiao-lin, kenapa kaoe dateng di sini sedengan hawa oedara begini panas?”

„Tia-Tia,” djawab itoe anak, jang satenga terlandjang, dengen napas sengal-sengal. „Mamatjang sakit keras dan soeroe akoe ka mari. Ia bilang, ia moesti ketemoein kaoe. Marilah balik — bersama-sama akoe.”

Sembari bitjara ia mengawasin moeka ajahnja dengen paras meratab.


„Tida, anakkoe, akoe tida bisa dateng — akoe belon bisa dateng,” menjawab sang ajah. Ah-fu merasa tida goena tjeritaken pada itoe botja bahoea ia lagi toenggoein bajarannja. Ia tambahken: „Bilang pada mamatjang, bahoea Tia-Tia sigra aken kombali dengen membawa obat boeat ianja. Pergilah kaoe poelang, djiwa-hatikoe, dan djangan dateng lagi ka sini.”

Dalem sakedjab mata, itoe anak soeda ilang dari pamandangan.

IV.

Itoe rerotan jang pandjang masih teroesken perdjalanannja. Sekarang marika menandjak ka satoe boe-kit, di poentjak mana soeda tersedia satoe koeboeran.

Ah-fu ingin ia bisa djalan lebih tjetep soepaja la bisa trima oepahannja lebih siang. Aken tetapi,



Boeatan-bergantoeng dan-berkoentji LIPS

Harganja, orang mempergoenakan akan boeatan-bergantoeng dan-berkoentji pada mendirikan roemah, djoemlah 0.6 sampai 1% dari semoea belanda-membroat. Dari sebab itoe tiada satoe kesokaran di-mempilih oentoek bahagian-itoe, barang dengan kela-koean kesatoe. Boeatan jang betobel-betobel, roepa jang elok, sentosa di-mentangoeng dari boeatan-bergantoeng dan-berkoentji, hendak meninggikan harga roemahnja. Senentiasa boeatan-bergantoeng dan-berkoentji djoega hendak memberi kesenangan lebi. Dari sebab itoe, memilih Lips. Satoe nama jang masjhoer, bilangan lemari-besi dan pintoe-pagan, tetapi djoega bilangan boeatan-bergantoeng dan-berkoentji. Banjak gedoeng soedah di-lengkap anteroe oleh kita dengan boeatan-bergantoeng dan-berkoentji Lips. Kapan kita boleh datang oentoek mentambah harganja dan sentosa dari engkau poenja gedoeng? Tjobalah menoelis itoe sebentar pada.



LIPS

Lindeteves-Stokvis

helaas, roepanja segala apa ada marintangken padanja. Samingkin lama tandjakan itoe djadi samingkin soesah dipandjat, samingkin lama djalanan itoe djadi samingkin sempit dan soeker.

Ia poenja sobat nasehatken padanja aken poelang sadja, aken tetapi ia tida maoe mendengerin.

„Iboemoe boleh djadi soeda pajah sekali,” kata itoe sobat. „Boleh djadi ia maoe tinggalken pesenan apa-apa padamoe, Ah-fu. Akoe nanti trimaken kaoe poenja bajaran, kaoe hanja haroes bilangin sadja padakoe obat apa jang moesti dibeli dan akoe aken lantas beliken itoe sabegitoe lekas akoe bisa.”

Ah-fu tida menjaoet, aken tetapi roepa-roepanja ia lagi berpikir. Ia teroes menandjak ka itoe boekit dengan tindakan berat dan napas sengalsengal. Mendadak terdenger soeara lotjeng, satoe tanda bahoea bagian depan dari itoe rerotan soeda sampe di koeboeran.

Menginget ia poenja bajaran, Ah-fu saolah-olah dapet tenaga baroe. Dengan tida mengasih djawaban atas pembilangan sobatnja, ia bertindak dengan tetep dan ia masih ada mempoenjai harepan. Achir2 itoe penggotong telah sampe di itoe koeboeran, dan taro itoe peti-djinasat di satoe tempat jang soeda disediaken.

Ah-fu poenja moeka bertjahaja. Ia samperin madjikannja, itoe toean tanah, dan minta ia poenja bajaran. Ia disoeroe minta itoe bajaran dari djoeroe-toelisna toean tanah.

Selagi ia moelai bertindak dengan tjepet aken poelang ka roemah sembari menggenggem itoe oe-wang, ia poenja anak lelaki kaliatan menjamperin lagi. Ah-fu djadi bertjeket dan berdiri diam. Ia tida oetjapken perkata'an apa-apa, aken tetapi ia mangarti.....

Sekarang segala apa di roemahnja soeda abis perkara..... tida oesah boeroe2 lagi! Ia poenja tangan mendjadi teklok. Satoe oewang perak djato di tanah.

Itoe botja menjamperin ajahnja dengan keringet berketel-ketel dan aer mata bertjoetjoeran. Ia tida



Menaksir afstand di atas aer

ada soesah sekali. Djoega boeat ambil foto. Brapa sering kasodahannja orang dapetken opnamen jang tida tadjem. Sekarang ini soeda berobah, sebab stellan atas doea titik dari Zeiss Ikon camera SIMPLEX membikin orang tida perloe menaksir-naksir dan djiadinja tida bisa keliro lagi, kerena ketadjensan gambar moelai dari $4\frac{1}{2}$ M. sampe seteroenja. Dan itoe doea titik mera (dipaten) ada begitoe gampang! Kaloe hawa oedara tjockterang, kasih itoe stellan atas doea titik tersebut dan $\frac{1}{25}$ seconde, salenja itoe, troesa tjape hatil — kaloe hawa oedara tida tjockterang, moesti digoensakken itoe boeka'an 1:6.3 dari Novar anastigmat. SIMPLEX camera dengan ini semoga sihat mangoentoengken dan — dengan pantsar dari bakelite, tjoema berharga f 31.50. Bisa dapet pada toko₂ foto jang back! Prospekt gratis, djoega dari N.V. = Isamy = Batavia-C.

Opnamen djempol dengan ini tiga alat: Zeiss Ikon camera, Zeiss objectief, Zeiss Ikon film!

**ZEISS
IKON**

menangis dengan keras, ia merasa tjape sekali. Achir-achir ia tida tahan berdiri dan djato di depan ajahnja sembari berkata dengan soeara pelahan: „Tia-Tia, mamatjang soeda.....”

Matahari moelai silem di belakangnya itoe megalah-megah. Soeara soeling berkoemandang di oedara.

Ah-fu djatoken diri deket anaknja. Ia poenja paras ada poetjat dan keringet mangoetjoer sakoe-djoer badannja. Aer matanja melele dan hatinja dirasaken antjoer. Ia oesap-oesap kapala anaknja, tapi matanja mangawasin itoe peti-djinasat besar jang ditoeroenken di dalem lobang. Di depan matanja berbajang peti-djinasat jang saderhana dari iboenja.....

T A M A T.

Roepa-roepa dari Hollywood

BAKERDJA TJEPET.

Denny Moore, satoe comedienne dari Broadway, telah sampe dari New York di Hollywood sasoeada lakoeken pelajangan dengen pesawat oedara lamanja toedjoebelas djam. Ia aken mamegang satoe hoofdrol dalem Columbia poenja film „Meet Nero Wolfe”.

Begitoe sampe di waktoe tengah malem, itoe actrice dari New York telah dikasihken koentji dari ia poenja kamar dan satoe copy dari scenario jang ia moesti apalken. Djam 9 pagi kabesokan-na ia pergi ka studio bersama regisseur Herbert Biberman. Marika berconferentie satoe djam lamanja dengen Edward Armold dan Lionel Stander jang djoega

mamegang rol-rol kapala dalem itoe production.

Kamoedian doea djam Denny liwatken dalem afdeeling pakean, di mana ia moesti sedengin itoe matjem2 pakean jang moesti dipake di dalem itoe film. Djam 12 tengahari ia bersantap dengen Biberman, Arnold, Stander, John Qualen dan laen-laen orang jang toeroet ambil bagian dalem itoe film. Djam 1 lohor ia koendjoengken make-up department. Djam doea lohor ia berada dalem salon toekang riasin ramboet. Dari djam 3 sampe djam 4 lohor miss Moore kombali ada dalem afdeeling pakean. Djam 5 sore ia berada dalem portrait gallery. Dan saban dapet tempo sedikit senggang, ia pahamken rolnja.



Karia Olic, kaponakan prampoean dari dr. Benesj, president republiek Czechoslowakye, baroe ini telah oendjoek debuut jang menarik perhatian dalem film „Stefanik”.



Gary Cooper dan Anna Sten, itoe doea filmster jang terkenal „in actie”.



Dalem concours ketjantikan jang berombongan masing-masing dari lima orang di Folkestone, Engeland, ini lima nona telah dapetken prijs ka satoe. Di depan beker jang marika dapetken.

RONALD COLMAN TIDA BISA NGANGGOER.

Ronald Colman, jang tida biasa menganggoer, sekarang soeda le-pasken segala harepan aken dapat hari vry, djikaloe ia tadinja ada mengandongceng harepan begitoe. Baroe ini ia telah liwatken haribakerdja ka 69 boeat film „Lost Horizon“ dan lagi 30 hari baroe itoe production dari Columbia, di bawah pimpinan Frank Capra aken selesih.

Djoega laen-laen orang jang toeroet maen dalem itoe film te-lah bakerdja teroes, antaranja Jane Wyatt, Edward Everett Hor-

ton, H. B. Warner, Isabel Jewell, Margo dan Thomas Mitchell.

Limapoeloe sets telah didiriken boeat pembikinan itoe film, antaranja itoe roemah pertapaan Sangri-La dan kebonnya, satoe doesoen Tibet, satoe doesoen Tionghoa dan deck seblah dalem dari satoe kapal besar.

MATJEM-MATJEM.


Michael Bartlett, jang sekarang terikat contract dengen Columbia Studies, terkenal dengen nama Ecardo Bartelli salagi mengasih pertoendjoekan2 dalem grand opera di loear negri.

Henry Mollison, laen acteur dari Columbia, perna bakerdja sebagai reporter dari London Daily News.

Victorian Killian ada salah satu amateur archer (djago panah) paling terkamoeka di Amerika Sariket.

Douglas Cumbrille ada saorang jang soeka koempoelin postzegels dan mempoenjai koempoelan post zegels paling besar dalem itoe filmkolonie.

Mebatja ada mendjadi kasoe-kaannja Richard Dix, star dari Columbia. Ia tjoba batja paling sedikit lima boekoe dalem tiap minggroe.



Apa pembatja tahoe

bahoewa kabiasaan aken memake boenga oranje (orangeblossom) dalem perkawinan ada berasal dari bangsa Moor?

bahoewa bagi itoe bangsa, orange blossoms ada sembojan dari kasoetjian dan banjak toeroenan?

bahcewa di djeman doeloe, jaitoe kira-kira dalem taon 1190, orang orang lelaki di Engeland katanja soeka kritingin dan bikin berom bak-ombak ramboetnja?

bahoewa, kaloe pergi ka manama, marika tida bertopi soepaja orang banjak bisa liat dan kagoemken marika poenja ramboet?

bahoewa Willian F. Cody, jang terkenal sebagai „Buffalo Bill“ telah diangkat mendjadi colonel oleh gouverneur Nevada?

bahoewa midrasa paling ketjil di Amerika Sariket boleh djadi adallah Dropsie College di Philadelphia?

bahoewa itoe college ada mempoenjai kira 25 student dan anem goeroe?

bahoewa tjoema 8% dari djoemblah pendoedoek Spokane, Washington, ada boeta hoeroef?

bahoewa Amerika Sariket ada mempoenjai 47.600 kantor post?

bahoea toean aken bakerdja boeat kebaikan sendiri, kaloe toean bantoe propagandain Panorama antara toean poenja familie dan kenalan, soepaja marika djoega berlangganian pada ini weekblad? Sebab dengen tambahnja abonnés Panorama bisa soegoehken lebih banjak kasenangan pada iapoenna pembatja!



Boeat orang² jang baroe semboeh

Burke's Guinness Stout ada satoe obat mengoeatken jang loear biasa sekali bagi orang-orang jang baroe semboeh dari penjakinja. Thabib-thabib poedijken itoe sasoeda orang dapetken influenza, bronchitis, demem dan laen-laen penjakin.


Tida ada minoeman jang lebih baek bagi orang-orang jang baroe semboeh, sebab bier item „Tjap Koetjing“ mengenggem phosphaat dan laen-laen dzat berharga jang mahgasih poela tenaga baroe dan energie baroe. Djikaloe Toeān minoem itoe, maka Toeān aken merasa, bagimana satiap hari Toeān djadi samingkin seger.

Bier item „Tjap Koetjing“ ada aseli betoel dan tida mangandoeng dzat-dzat jang berbahaja. Ia membangoenken napsoe makan, membantoe pertjernahan makanan dan membantoe boeang-aer.

Silahkan Toeān tjoba salama beberapa minggoe sabelonna atawa salagi bersantap, maka Toeān aken menampak, bahoewa Toeān aken merasa banjak baekan.

Bier item tjap Koetjing Burke's Guinness Stout

soenggoeh baik boeat toeān



Kebearuan Toko Nehry



Salah Tindak

Oleh: HOUBIGANT.

3

Kaloe doeloe Kim Giok ada begitoe perhatiken pada dirinja Corrie, kapan biasanja Kim Giok begitoe tida bernapsoe boeat menikah dengen laen prampoean selaennja Corrie, adalah sekarang sa-soedahnja ia ketemoe dengen Goat Nio, itoe gadis dari Tjiandjoer, iapoenja hati telah mendjadi berubah begitoe roepa.

Romannja Corrie jang saban saat soeka-ber-bajang depan matanja sekarang soedah tida kaliasan poela, sebagai gantinja adalah Goat Nio gadisnya entjek Ie Tek.

Sigra djoega Kim Giok telah bales soeratnja Goat Nio jang berboenji :

Ade Goat jang moelia,

Sanget tida dinjana saja soedah trima ade poenja soerat jang dengen teroes terang saja bilang bahoewa itoe soerat saja trima dengen girang sekali.

Kenapa saja begitoe bergirang terima ade poenja soerat, kenapa saja dengen lekas djoega kepingin dateng poela di Tjiandjoer waktoe abis membatja ade poenja soerat? Soenggoe saja tida bisa peijahken; tapi biar bagimana djoega rasanya ade poenja soerat itoe seperti djoega saja pandang ade poenja diri sendiri.

Trima kasih boeat ade poenja perhatian jang begitoe besar atas saja poenja diri, dan sebaliknya saja poen di Batavia medowaken biarlah ade dan sekalian familie sedalem roemah ada delem selame dan tida koerang satoe apa.

Apa ade nanti bergirang apabila saja koendjoe-ning poela ade poenja kadiaman? Boeat saja dengen sasoenggoehnja aken berarti satoe kagirangan, sebab saja bisa berdjoempah poela dengen ade jang moelia.

Biarlah saja menoelis sampe di sini doeloe.

*Hormatnja,
LIE KIM GIOK.*

Kim Giok bersenjoem-senjoem seabisnja menoelis soerat terseboet.

Ia merasa girang sekali, dan sementara itoe romannja Corrie sedikitpoen tida ada kaliatan ber-bajang depan matanja. Kim Giok sekarang soedah balik pikir, ia telah singkirken itoe ingetan gelo

jang maoe djoega menoenggoe Corrie jang soedah mendjadi orang poenja.

Laen harinja Kim Giok trima balesan dari Goat Nio, jang mana boeninja ada sanget menggiring-ken kita poenja anak moeda.

Demikianlah moelai dari itoe koetika, itoe doewa anak moeda telah soerat menjoyerat dalem rasia, sampe kamoedian masing-msing menjataken pengrsahan ingin ldoep dalem satoe roemah sama-sama.


Sekarang Kim Giok soedah mendapat kepastian jang Goat Nio maoe mendjadi iapoenja istri, tinggal ia minta pertoeloengannja iapoenja mama jang nanti aken lamarken dirinja itoe anak dara dari Tjiandjoer.

Pada satoe hari waktoe entjim Soen Ping sedeng doedoek mengangin di serambi depan Kim Giok menjamperin dengen bersenjoem-senjoem.

„Kaoe kaliatannja begitoe kagirangan, ada apa sih Giok?” tanja entjim Soen Ping.



Doea andjing jang dapet prijs dalem tentoonstelling andjing internationaal di Groningen (Nederland).



Kebon binatang di Rotterdam.— Zebra dengen ia poenja anak.

„Girang soedah tentoe mama, sebab saja ada poenja kabar baek jang maoe disampeken sama mama, tapi saja sangsi apa mama nanti maoe kasih bantoean atawa tida,” djawab Kim Giok sambil oendjcek senjoemannja.

„Perkara apa itoe, Giok? Apa begitoe poenja soelit?” tanja poela sang iboe.

„Soelit sih tida, tjoema apa mama nanti tida tertawaken sama saja?” balik menanja Kim Giok kepada iboenja.

Entjim Soen Ping tida mendjawab, hanja ia djadi tertawa mendenger omongannja sang poetra jang toenggal.

Achirnja Kim Giok boeka rasianja pada entjim Soen Ping, ia menjataken bahoewa ia ada tjintaken dirinja Goat Nio.

Sasoedahnja abis Kim Giok menoetoer, entjim Soen Ping telah tertawaken poetranja.

„Kenapa kaoe tida sedari doeloe bilang begitoe, Giok? Ini si Corrie kaoe macein, akoe soedah bilang bahoewa Corrie itoe boekannja satoe gadis dalem mana kaoe nanti bisa hidoeper beroentoeng bersama-sama. Corrie ada sanget tengal laganja, itoelah akoe soedah iama taoe. Ia poenja peladjaran baroe kaloewaran H.B.S. sadja ia soedah begitoe poenja tegnik, ia soedah begitoe poenja sompong, hingga boekan sadja akoe sendiri si orang toewa jang merasa mendongkol meliat laganja, tapi djoega boekannja sedikit diantara kawannja jang telah

djaoehken diri. Sementara kaoe sendiri bisa bandingken antara Corrie dan si Goat, sekalipoen si Goat itoe boekannja kaloewaran sekolahannya jang sama tingginja dengen Corrie. Si Goat mempoenjai itoe pribodi jang moelia, liat iapoenja paras moeka jang begitoe mengasih dan bedjik, membikin sasoewatoe orang merasa soeka padanja. Tjoba kaloedeloean kaoe toetoerken bahoewa kaoe maoe menikah dengen si Goat, tida seberapa soeker akoe toeloeng lamarken pada dirinja; sebab selaennja ia ada mendjadi familie kita, djoega memang katinginannja si Ie Tek adalah ia poengoet mantoe, poengoet satoe pemoeia piatoe sebagai mantoenja soepaja maoe diam di roemahnja di Tjiandjoer, dengen mana djadinja si Goat tida berpisahan.”

Kim Giok merasa boengah hatinja tatkala mendenger omongannja sang iboe. Sebagi tanda bahoewa ia merasa begitoe kagirangan, ia tida bisa berboeat laen dari pada manggoet-manggoetken kepalanja.

*

Beberapa boelan kamoedian Kim Giok telah menikah dengen Goat Nio.

Itoe sepasang orang moeda saling menjinta satoe sama laen, itoelah pembatja sekalian bisa mengarti, sebab itoe perdjodoan boleh dibilang ada atas pilihannja sendiri.

Sadjek Goat Nio menikah telah ikoet soewami-

nja tinggal di Batavia, tjoema sadja soepaja iapoe-nja orang toea di Tjiandjoer tida begitoe kasepian dalem satoe minggoe tiga ampat kali ia poelang ka Tjiandjoer menengokin orang toeanja.

Ie Tek poen memang merasa setoedjoe mempoenjai mantoe seperti Kim Giok, maka itoe mer-toewa ada sajang sekali sama itoe anak moeda. Ia poenja pengharepan ada ditaro atas poendaknya Kim Giok, sebab kaloe satoe waktoe iapoenja hari baek, ia bisa pasrahken kekajahannja pada itoe mantoe dan siapa ia pertjaja tida aken sia-siaken Goat Nio, iapoenja poetri jang toenggal dan sanget di sajang.

Baeklah kita adjak pembatja menengok apa jang soedah terjadi dengen Corrie.

Sedari menikah dengen Eng Tjin, Corrie semangkin genit dan merdika sekali bergaoelan. Djoestroe adalah itoe jang Corrie tjari.

Ia merasa tida menjesel kawin dengen Eng Tjin, sebab itoe pemoeda ada sama toedjoeannja dengan ia, sementara kaloe ia menikah dengen Kim Giok ia bajangken betoel-betoel aken membikin hatinja sanget sedih, sebab Kim Giok sekalipoen kaloewaran sekolah dan dapet didikan modern, tapi kakoenan masih melengket dalem sanoebari-nja.

Itoe sebab djikaloe ia menikah dengen Kim Giok, Corrie pikir ia aken tida dapatken itoe kamer-dikahan sebagimana sekarang ia ngalamken dengen Eng Tjin.

Aken tetapi segala apa jang jang dilakoeken dengen terboeroe napsoe, biasanja soeka berachir dengen kagetiran, begitoe djoega kedjadian dengen pernikahannja Corrie dan Eng Tjin.

Semangkin lama Eng Tjin semangkin koerang senang sama istrinja, sebab Corrie semangkin genit kaliatannja dan sering soeka tinggalken ia dan bersama sama dengen kawan-kawannja jang laen

djalan-djalan.

Sekalipoen Eng Tjin ada itoe pemoeda jang demen bergaoel dan soeka sekali djalan-djalan, aken tetapi meliat tingkah lakoenja sang istri jang telah meliwatir dari wates kewadjiban sebagi satoe istri, membikin hatinja koerang senang.

Ia memang mempoenjai itoe toedjoean kasih-ken kamerdikahan kepada istrinja saloewas-loewasnja, aken tetapi boekannja loewas sampe meli-watin dari wates jang ditentoeken oleh kewadjiban sebagi satoe istri terhadep soewaminja.

Itoe pengrasahan koerang senang semangkin lama semangkin hebat Eng Tjin rasaken, maka djoega pada satoe hari waktoe Corrie permisi padanya maoe djalan-djalan dengen kawannja ia telah menegor:

„Cor, saja soedah kasiken kamerdikahan tjoekoep padamoe boeat kaoe bergaoelan dengen siapa djoega, aken tetapi ternjata kaoe soedah meliwinthin dari wates kewadjiban.”

„Kenapa kaoe bilang begitoe, Tjin?” tanja Corrie sambil bersenjoem.

„Itoelah saja moesti bilang, Cor. Sabegitoe lama saja mendjadi kaoe poenja soewami, saja ada merasa mempoenjai itoe hak boeat bilang apa-apa padamoe, apa jang dikira ada koerang pantes dan tida menjenangkan pada saja sebagai kaoe poenja soewaminja.”

Dari bersenjoem Corrie mendjadi tekoek moeka.

„Saja ada mendjadi kaoe poenja soewami,” me-landjoetken Eng Tjin, „dan saja ada mempoenjai kewadjiban boeat biang apa-apa padamoe kaloe itoe dirasa oleh saja ada koerang pantes dan tida lajik dilakoeken oleh satoe prampean jang soedah ada soewaminja.”

„Saja tida mengarti dengen kaoe poenja omo-njan jang poeter balik, bilanglah dengen teges soepaja saja bisa mengarti!” kata Corrie dengen ketoes.

MAGGI'S AROMA

Tjamperlah - adéklah - berasalah
Sedikit tetes-tetes membaiki rasanja
dan kekœatannja segala idangan.

Eng Tjin jang memang adatnja ada berangan-
san mendjadi sengit.

„Saja bilang dengen baek, tapi kaoe kaliatan-
nya tida maoe mengarti sama kesalahan sendiri.
Apa memangnja kaoe masih gadis? Apa kaoe masih
belon poenja soewami? Saja tida mengarti dengen
kaoe poenja pikiran jang masih seperti anak-anak,
Cor!“

Corrie kaliatan tida maoe ladenin sama iapoen-
ja soewami, sekoetika itoe djoega dengen angkat
poendak ia kaloewar dan samperin iapoenja kawan-
kawan jang menoenggoe pada satoe restaurant
boeat sama-sama nonton.

Eng Tjin djadi mendongkol sekali. Ia sekarang
menjesel kenapa doeloean ia telah begitoe ketarik
sama dirinja Corrie, sedeng itoe gadis sebetoelnja
boekannja itoe gadis jang boleh diboeat temen hi-
doep boeat selama-lamanja.....

Saban kali Eng Tjin kasih nasehat sama Corrie,
tapi masoek dalem lobang koeping jang sebelah
kanan itoe nasehat telah kaloe ar poela dari lobang
koeping jang kiri. Maka poen tida heran kaloe Eng
Tjin poenja beberapa nasehat jang baek djoega
sebagi lajiknja satoe soewami tida masoek ka dalem
hatinja Corrie.

Pada satoe hari kombali itoe soewami istri te-
lah tjektjok, saking gemesnja Eng Tjin soedah am-
bil satoe tongkat dan poekoelin pada Corrie.

Corrie melawan dan merangsang sama Eng Tjin,
aken tetapi biar bagimana gagahnja djoega ada
tenaganja satoe prampoean achirnja Corrie mendjadi
korbannja itoe tongkat. Hingga soewaranja eba-
tan jang mengenaken badannja Corrie kadengeran
beitoe keras, dan Corrie itoe waktoe baroe mena-
ngis menggeroeng-geroeng saking kesakitan.

„Kaoe berani seksa saja, Tjin!“ begitoe Corrie
dalem nangisnja telah kata: „Biarlah moelai ini
menit saja poelang ka roemah orang toea sendiri,



OBAT JANG TERBAIK

boeat Penjakit peroet dan sakit oesoes
Sakit kepala dan kepala poesing

OBAT MELAWAN PENJAKIT

jang berbisa Sakit menoelar, sakit
medjen dan sakit diarrhea

BOEAT KEBERSIHAN MOELOET

Misti perloe sedia di Lemari boeat
seisi roemah

BISA DAPET DI ROEMAH OBAT

**ALCOOL DE MENTHE
DE RICQLES**


Imp.: „Hagemeyer & Co. 's Handel Mij. N. V.”


saja tida soedi ikoetin kaoe toekang moekoelin
kaoem lemah.....”

„Kaoem lemah, hmm, bagoes, bagoes ja,” kata
Eng Tjin dalem kagoesaranja. „Kaloe kaoe me-
ngarti bahoewa dirimoe ada satoe kaoem lemah,
kenapa kaoe tida maoe mengarti kaloe si kaoem
koeat bilang apa-apa aken kebaeknja kaoe poe-
nja diri?“

„Kaloe kaoe soedah tida soeka pada saja, ke-
napa kaoe tida maoe anterken saja poelang ka roe-
mah orang toea saja? Saja boekannja kerbo di-
poekoelin, bagoes betoel kaoe poenja perboeatan,
Tjin!“

(Aken disamboeng).





Boeat nejama kalah dalam hikajat Inggris, baro; ini Baginda Edward bikin perdjalanan inspeksiie dengan pesawat udara sapanjang station paterangan dari Royal Air Force. Kiri: Baginda inspecteur pesawat palempar bom di Mildenhall. Kanan: Salagi berdiam di Northolt. Baginda pengang lantaran soera motor itoe pesawat pesawat jang terpoeter berbareng dengan sapenoeh tenaga.

KANG LAM TJOE HIAP

Menoeroet tjeritanja:

CHUNG CHI YU

Ditoetoerken oleh:

JE KADE

8

Sakoenjoeng-koenjoeng dari sebelah bawah kalianan lontjat poela doe orang; jang djalan doeloe ada satoe orang dengen moeka dan ramboet berwarna poetih, dan jang belakangan jalah itoe prampoean moeda jang baroesan tertawan. Marika ini boekan laen orang dari pada Thian Thay dan gadisnya.

Koetika meliat kedadengannja itoe doe orang baroe, Lie Hok dan kawannja mengarti jang iaorang bakal kalah, maka sambil berseroeh keras iaorang tjebet tjebet lari toempang sioer terpentjar ka sana sini. Tapi ternjata itoe tiga orang tida mengedjer, hanja lantas berkoempoel dengen penoeoh perasahan girang. Kamoedian sasoedanja satoe sama laen bitjara sakean lamanja, iaorang sigra lontjat toe-roen ka tanah, dari sitoe gladah semoea roewangan-na itoe roemah, boeat tjari kambrat-kambratnja marika poenja petjoendang. Tapi satelah lama djoega marika oebek oebekan, baroelah marika beroentoeng dapetken doeа tootong dan tiga lauwtoo toe-kang njalahken api dan pikoel aer, jang semoeanja mengoempet di dalam roewangan dapoer. Marika ini dengen toeboeh menderekdek bahna kaget dan katakoetan, berbareng minta ampoen pada itoe tiga orang gagah.

„Ja, marika semoea memang tida ada sangkoe-tannja,” kata Oen Hoa pada ajahnja dan Tjoe Siang „maka kita ampoenken sadja marika.”

Tjoe Siang bentak itoe sakean tootong dan lauwtoo boeat berbangkit, kamoedian soeroeh marika sediaken sedikit arak dan sajoeran boeat marika dahar di roewangan pertengahan loear. Sasoedanja itoe, Tjoe Siang panggil djoega itoe gadis jang bernasib tjlaka, Tjiok Ah Kauw, dari kamar samping boeat dahar sama sama marika.

Sembari makan minoem Thian Thay tanja gadisnya, tjara bagimana maka bisa sampe ka sitoe.

„Itoe hari satelah akoe minggat lantaran djengkel, menerangken Oen Hoa, „teroes ambil katetepan boeat goenaken itoe Tong Sim Kiat sebagai boekti, tjari sampe dapet itoe pendjahat jang gondol ade

Tiat Hoa. Pada soeatoe hari akoe ketemoeken Pek Tjoan di Kioekang, ia ini kasi taoe padakoe jang itoe Tong Sim Kiat ada milknja; akoe pertjaja djoega itoe keterangan, lantaran akoe dapetken sikepnja seperti betoel betoel dan kepandean lompat-nja poen boleh djoega. Lantaran begitoe, niatan boeat boenoeh mati padanja sigra timboel dalem otakkoe; tapi blakangan akoe pikir laen. Akoe koeatir kaloe akoe lantas boenoeh padanja, tentoe tida aken bisa dapet taoe di mana ade Tiat Hoa disemboeniken. Maka itoe akoe lantas oeroengken maksoedkoe jang pertama, sebaliknya akoe tanja padanja dengen manis, di mana ia taro Tiat Hoa. Ia bilang di Thian Tjoe San, kaloe akoe maoe ikoet padanja bisa lantas ketemoe. Akoe poera poera bilang masih ada oeroesan maoe pergi ka Thay-ouw, maka di sitoe kita lantas berpisahan. Tapi setjara menggelap akoe koentit padanja, hingga beberapa kampoeng telah diliwatken dan zonder merasa, baroesan akoe sampe di sini. Tadi menggerip akoe pandjat ini goenoeng boeat lakoeken penjelidikan, tida taoenja marika berdjoemblah banjak, hingga akoe kena tertawan. Soekoer kaeo orang kaberoe dateng, hingga akoe djadi terloepoet dari bahaja tjlaka.”

Satelah menoetoer begitoe, seloeroe moekanja Oen Hoa berubah merah, saolah-olah merasa maloe dan djengah. Samentara Tjoe Siang, telah melirik sabentaran pada itoe gadis, sigra toendoeken kapala.

„Tapi itoe pedang moestika di mana?” tanja Thian Thay pada gadisnya.

„Ai, sajang, itoe pookiam telah digondol si pentjoker!” berseroeh Oen Hoa seraja banting2 kaki dengen roman do-ka sekali.

„Betoel sajang,” Tjoe Siang djoega njataken kamenjeselannja.

Thian Thay semingkin djengkel hatinja, ia sampe geprak-geprak medja.

„Itoe ada ‘koe poenja pedang toeroenan, bagaimana ia moesti dibikin ilang?’” kata ia dengen sangat djengkel. „Kendati sampe mati oepamanja, moesti

ditjari djoega sampe dapet."

Oen Hoa merasa djengkel dan iboek sekali, tapi zonter bisa berboeat apa-apa. Ia hanja tinggal toendoekin kepalanja sambil boeat maen oedjoeng badjoenga. Tjoe Siang merasa tida tega, maka ia tjepet hiboerken ajahnja itoe nona.

„Soedalah, loopee djangan terlaloe djengkel,” kata itoe pamoeda pada Thian Thay. „Satoe barang moestika, dibelakang hari tentoe bisa poelang lagi, apa poela semoeanja berglandangan di kalangan kiamsoet, mana ada atoeran tida bisa didapetken.”

„Paling bener lantas ditjari,” saoet Thian Thay, „soepaja kataoean apa bakal bisa dikatemoeken kombali.”

„Itoelah kita boleh pikir lagi blakangan,” kata Tjoe Siang, „sebab oeroesan kita sekarang masih belum beres.”

Thian Thay setoedjoein pendapetannja itoe pamoeda, maka ia tinggal diam, tapi roepanja ada banjak lebih sabar dan terhiboer.

„Tapi tjara bagimana ajah bisa saling ketemoe dan dateng ka mari?” tanja Oen Hoa achirnja. „Apa ade Tiat Hoa soeda dapat ditjari?”

Thian Thay laloe toetoerken iapoenna sasceatoe pengalaman dengan djelas, tida satoe bagian jang ia semboeniken, hingga di sa'at itoe ajah tjeritaken tentang perdjodoannja itoe gadis dengen itoe pamoeda jang ada di depannja, Oen Hoa djadi merah moekanja lantaran maloe dan lantas sadja toen-doecken kepalanja. Tjoema kadang2 ia melirik pada Tjoe Siang dengen semboeni. Tapi ini pamoeda, jang merasa djengah djoega, sigra simpangken itoe pem-bitjara'an ka laen djoeroesan. Ia toetoerken prihal dirinja itoe gadis jang bernasib tjilaka, jaitoe Tjiok Ah Kauw.

„Itoelah boekannja soewal soeker,” kata Thian Thay achirnja satelah mendenger abis penoetoeran-nya itoe pamoeda. „Kaloe sabentar kita toeroen goenoeng boleh diadjak sekalian dan dianterin poelang ka roemahnja, abis perkara.”

„Mana bisa,” membantah Tjoe Siang. „Tjiok-kee poo terletak di Timoer-oetara dari Thian Tjoe San, djalananna boekan jang kita haroes ambil.”

Thian Thay diam selakoe jang lagi tjari pikiran.

„Kaloe begitoe,” kata ia kamodian, „baek kita bawa sadja padanja ka roemahnja itoe paman tani di mana kita noempang menginep. Pada itoe toe-kang kebon kita minta pertoeloengannja soepaja di anterin satoe soerat ka roemahnja itoe gadis, agar dari sana nanti dikirim orang aken bawa padanja poelang.”

„Betoel, itoelah betoel sekali!” menjataken Oen Hoa dan Tjoe Siang dengen berbareng.

„Bagimana? Apa kaoe setoedjoe?” tanja marika kamodian pada Ah Kauw.

„Kendati inkong maoe atoer bagimana djoega,” saoet itoe gadis jang bertjilaka, „asal sadja bisa sampe ka roemah, akoe merasa sanget bersoekoer.”

Itoelah ada djawaban jang memang marika harrep, maka itoe hal telah djadi beres sampe di sitoe. Sekarang marika makan minoem poela dengen pikiran lebih lega. Tatkala masing2 telah merasa tjoe-koep kenjang, Thian Thay dan Tjoe Siang laloe tjari roempoet2 dan kajoe2 kering, jang marika lantas koempoelken di bawahna pajon roemah.

„Ini goa siloeman moesti didjadiken laoetan api,” kata marika dengen keras sembari giat koenpoelken itoe bahan api. „Tjara begitoe baroe bisa mein-poewasken hatinja orang banjak.

„Tapi kaoe orang moesti oeroes doeloe itoe beberapa lauwtoo dan tootong,” kata Oen Hoa jang njataken pikirannja, sebab kaloe ini tempat soeda di bakar marika djadi boentoe djalan dan bisa terloenta loenta. Dengan begitoe kita djadi seksa orang tida berdosa.”

„Betoel, itoelah betoel,” Thian Thay dan Tjoe Siang njataken setoedjoe. Sembari berkata begitoe marika tjepet tjari sedikit oewang mas atawa perak, teroes dibagi bagiken pada itoe sakean toosoe kolot dan anak anak, soepaja sakaloearnja dari sitoe marika djadi mempoenjai modal boeat berdagang menaercet kabisahannja masing masing.”

Itoe sakean toosoe dan tootong menghatoerken trima kasih sambil manggoet-manggoetken kepalanja dengen berloetoet. Kamodian marika berlaloe dari sitoe.

Thian Thay dan Tjoe Siang moelai bakar itoe roempoet2 kering, jang dalem sakedjepan sadja sigra berkobar kobar meloelahan ka sana sini. Tambahan itoe waktoe ada di dalem moesin panas keras, tidak heran djikaloe sabentaran sadja itoe roemah peranti soetjiken diri djadi laoetan api, hingga sorotnya jang berkobar-kobar ka atas membikin sasoeatoe tempat gelap di itoe goenoeng berbalik mendjadi terang saopama siang. Teroetama itoe tempat ada terletak di poentjak goenoeng jang tinggi, tida poen heran apabila di sakiternja itoe tempat antara beberapa poeloeh lie djaoehnja, orang bisa saksiken itoe kabakaran. Tjoema lantaran orang mengira tida lebih dari oetannja itoe goenoeng jang kabakar, teroetama di waktoe malem begitoe, maka tida ada satoe orang jang tjoba mengamperin ka itoe tempat. Itoe sebab, Thian Thay bersama gadisnya dan Tjoe Siang, serta itoe gadis jang bertjilaka, djadi tida mendapat rintangan apa apa dari pendoe-deuk itoe tempat.

„Sekarang, baroelah ada kóetika jang baek sekali aken kita semoea toeroen goenoeng!” berkata Tjoe Siang satelah liwat sesa'at sembari tertawa girang. „Sebab kaloe api tida berkobar-kobar lagi,

tentoelah satoe anak prampoean sebagi Tjiok Ak Kauw tida aken bisa djalan dalem kagelapan."

Semoea orang djadi tertawa mendenger itoe itoe oetjapan, tapi masing masing tida bisa bantah kabenerannja.

Kamoedian, sasoedanja iaorang menengok lagi sakalih pada itoe laoetan api, sigra djoega iaorang toeroen goenoeng. Tapi njatalah, lantaran oesianja jang masih moeda dan tenaganja lemah, Ah Kauw tida bisa djalan sebagimana moestinja — kaliatan-janja sangat soesah pajah. Meliat begitoe Oen Hoa merasa tida tega, laloe ia tawarin dirinja boeat gendong itoe nona jang bernasib malang, hingga nona tersebut boeat merasa sangat girang. Dengan tjetep ia mengglendot ka atas poendaknya Oen Hoa jang sebelah kiri, hingga dari sitoe ia djadi digendong, tapi bagi Oen Hoa tida berarti apa apa, lantaran ini gadis mempoenjai tenaga jang lebih besar dari lelaki kebanjakan. Dengan begitoe, Ah Kauw djadi merasa sangat bersoekoer dan trima kasih pada itoe gadis jang moelia hatinja.

Tempo iaorang sampe di kaki goenoeng, matahari soeda moelai oendjoek pengaroechnja, maka koetika iaorang telah sampe di roemahnja itoe paman tani jang iaorang toempangin, itoe penerangan doenia soeda naek tinggi, koerang lebih antara djam sembilan sapoeloeh siang.

Itoe paman tani merasa sangat kaget tertjam-poeer heran koetika meliat kadatengan marika zon-der ketaoean perginja, sebab marika poenja pintoe dan djendela kamar semoeanja masih kadapetan ter-toetoep. Lebih-lebih kaheranan itoe bertambah besar tempo meliat kadoea tetamoena, jang semalem tjoe ma menginep berdoea'an, sekarang balik poelang dengan adjak doe kawan prampoean, jang doe-doeanja masih moeda dan tjantik parasnja. Tapi sabellonna ia njataken apa-apa, kaboberoe Thian Thay menghamperin padanja dengan tjetep dan sigra toe-toerken apa jang telah terjadi; tjara begitoe baroe-lah katjoeriga'nnja itoe paman tani djadi linjap, dan malah berbalik merasa girang.

„Tida poen heran semalem di atasnja itoe goenoeng kaliatan sinar api berkobar-kobar," kata itoe paman tani satelah mendengerin kterangannja ia-poenja tetamoe, „kiranya kaoe orang poenja per-boeatan jang berhasil mengoebrik-abrik sarangnja pendjahat dan kamesoeman."

Sasoedanja berkata begitoe itoe paman tani silahken tetamoena masoek, kamoedian satelah ia beres mengatoer satoe medja perdjamoean, ia oen-dang semoea tetamoena doedoek bersantap.

Itoe waktoe ada beberapa prampoean dari itoe desa, jang lantaran meliat parasnja Oen Hoa sangat eilok saopama bidadari, satoe persatoe merasa sangat heran dan kagoem, masing masing tida bisa soe-

da memandang pada itoe gadis jang moesti diakoen ada tjantik sekali. Hal itoe lantas tersiar dari satoe ka laen moeloet, begito sateroesnja, sampe ampir semoea pendoedoek desa terseboet, toea, moeda, besar kejil, lelaki-prampoean, rata rata mengetahoei adanja itce hal, hingga iaorang djadi sanget ketarik boeat menjaksiken sendiri, maka dengan rame rame iaorang laloe dateng ka roemahnja itoe paman tani, seperti djoega hendak meliat tontonan apa-apa jang loear biasa. Itoe sebab di depan roemahnja itoe toe-kang kebon djadi banjak sekali orang jang berkroemoenan dan saling desek satoe pada laen, perloenja tjoema boeat bisa meliat dirinja Oen Hoa jang tjantik molek, dan lantaran kabanjakan, soearanja itoe orang jang berdesek desek dan memoedji pada ketjantikannja itoe nona, djadi rioeh sekali kadeng-rannja. Lantaran begitoe, hatinja Thian Thay djadi merasa koerang enak, maka dengan boeroe-boeroe ia laloe benahken sasoeatoe barang bekalannja boeat lantas brangkat. Sembari bebenah ia oetaraken maksoednja pada toean roemah boeat titipken Ah Kauw sampe bebrapa hari lamanja, serta bermoe-hoen djoega, soepaja itoe gadis jang bernasib tjlaka dioero's sampe bisa poelang ka roemahnja.

Itoe paman tani, lantaran mendenger itoe nona ada gadisnya Tjiok Wan-gwee jang terkenal, tambahan dapat itoe permoehoenan dari tetamoena jang dermawan dan royaal, djadi tida bisa menoelak, maka ia menjanggoepin beroelang-oelang.

Sasoedahnja itoe, Thian Thay bersama gadisnya dan Tjoe Siang laloe tinggalken itoe doesen dan moelai brangkat ka Ankeng.

Tempo pada soeatoe menggerib iaorang sampe di Thay-koan, sakoenoeng-koenoeng dari dalem oetan di depan marika kaliatan lontjat kaloebrang jang tjetegat marika poenja perdjalan.

„Pelahan sedikit, kwanan koertjatji!" berseroeh marika dengan soeara keras. „Sekarang kita soem-pah moesti bales itoe sakit hati!"

Tatkala Thian Thay dan doe kawannja mengawasin, ternjatalah marika itoe ada Lie Hok, Kiang Lip, Wan Soe Tie dan Pek Tjoan berampat, bekas marika poenja petjoendang, hingga zonder merasa marika djadi tertawa geli.

„He, petjoendang," berseroeh Thian Thay dengan tida koerang kerasnja. „Kaoe orang masih brani tjetegat kita? Liatlah....."

Sigra djoega iaorang madjoe merangsek, tapi baroe sadja iaorang maoe tjaboet goloknja masing-masing, mendidak dari dalem oetan kadengeran poedjhannja orang pertapan.

„Slantjay!" demikian itoe poedjian, dan satoe toosoe kolot sigra moentjoel di depan marika.

Tempo Tjoe Siang mengawasin, ia djadi kaget sekali, sebab itoe toosoe kolot ada Siauw Tiang

Tjhay jang terkenal. Selagi ia maoe menegor, atawa itoe lauwtoo telah mendoeloein moendoerken ampat moeridnja dan laloe madjoe ka seblah depan.

„Jang mana itoe kiamkek dari Pek Kong Pay?” menanja Siauw Tiang Tjhay dengen roman keren.

„Jalah akoe jang rendah,” menjaoet Tjoe Siang seraja madjoe ka sebelah depan kawannja.

„Kaoe moerid siapa?” menanja lagi Siauw Tiang Tjhay.

„Akoe moeridnja Yong Yong Tjoe. Tapi kaoe ini, apa Siauw Tiang Tjhay tooheng.”

Siauw Tiang Tjhay tertawa bergelak-gelak.

„Kiranja kaoe moeridnja Yong Yong Tjoe,” kata ia. „Kita toch tida bermoesoehan apa-apa, mengapa sebaliknya kaoe bakar abis akoe poenja tempat pranti soetjiken diri? Itoelah sanget katerlaloean. Tapi bisa djoega kaoe dapat ampoen djikaloe kaoe maoe bitjara setjara tjenglie. Kaloe tida, djanginan harep kaoe orang bisa lolos!”

„Kaoe poenja moerid moerid jang berboeat salah, sebaliknya maoe timpahken semoea kesalahan padakoe? Soenggoe bagoes perboeatanmoe!” Tjoe Siang balesin dengen roman dan soeara goesar. „Apa itoe goa kamesoeman maoe dinamaken tempat soetji?”

„Djangan banjak batjot!” membentak Siauw Tiang Tjhay dengen sanget goesar. „Setjara baek akoe peringetken padamoe, kerna apa kaoe brani tjtji orang tida karoean?!”

Tida tempolagi Siauw Tiang Tjhay pentang moeloetnja moentahken satoe sinar idjo, jang teroes samber moeridnja Yong Yong Tjoe.

Tjoe Siang djoega sigra lepas iapoenja kiamkong sinar poetih dan tangkis itoe serangan, hingga itoe doea sinar pedang, idjo dan poetih, lantas saling serang dengen seroeh.

Meliat begitoe, Lie Hok dan kawannja madjoe ka depan pekalangan, tapi baroe sadja iaorang bergerak boeat membantoein goeroenja, atawa Siauw Tiang Tjhay telah menjega dengen tjepeet.

„Soedah, kaoe orang djangan madjoe!” kata itoe goeroe. „Biar akoe sendiri jang beresin ini orang!”

Lie Hok dan tiga kawannja moendoer poela; iaorang tjoema mengawasin sadja sambil berdiri di sebelah belakang.

Itoe doea kiamkong jang terpoeter-poeter di atas oedara, teroes saling serang dengen sanget seroeh dan gesit kaliatannja. Sabentar jang satoe ada di sebelah atas dan jang laen di sebelah bawah, dan sabentar poela jang satoe menjerang dan jang satoenja mananagkis atawa kelit. Tapi lambat laoen sinar poetih kapoenja'nnja Tjoe Siang moelai kater dan kadesek moendoer, tida begitoe dengen kapoenja'nnja Siauw Tiang Tjhay dari sinar idjo,

jang semingkin gagah dan berbahaja, teroes terpoeter-poeter di sebelah atasan kapalanja Tjoe Siang, Thian Thay dan gadisnya. Sebab itoe seloeroe moekanja Tjoe Siang djadi penoeh keringet, semingkin lama iapoenja kiamkong semingkin lemah dan pelahan2 tida bisa lakoeken perlawanannya lagi sebagimana moestinja, sebab pandjangnja tjoema tinggal satoe kaki lebih sadja, dan kaloe dibandingken dengen kapoenjahan lawanannya, terpaoetnja ada kira kira tiga bagian lebih. Itoe sebab hatinja Tjoe Siang merasa pasti jang ini kalih ia bakal tjilaka. Tjoba itowaktoe ia mas bawa dan bisa goenaken Thian Lam Hie Soo poenja Kiam-wan, tentoe sekali dirinja tida aken hadepken itoe keada'an berbahaja.

Samentara Thian Thay dan Oen Hoa sekalipoen tida mengarti ilmoe Kiamsoet, tetapi meliat itoe keada'an, iaorang mengetahoel djoega jang Tjoe Siang soeda berada di bawah angin. Lantaran itoe iaorang djadi djengkel sekali, tapi zonder bisa berboeat apa apa.

Itoe sinar idjo mendesek teroes dengen seroeh, seperti djoega bintang sapoe jang berkredup-kredup, hingga sakedjepan sadja itoe sinar poetih djadi terlebih ketjil belon tjoekoep tiga duim, dan teroes moendoer sampe ka depan kapalanja Tjoe Siang, maka dengen kaget ini pamoeda lontjat moendoer dan boeroe boeroe tarik poelang iapoenja kiamkong itoe jang tida bisa melawan poela, sebaliknya ia goenaken golok mendjaga sakena-kenanja itoe sinar idjo jang memboeroe teroes.

Tapi satengah djam kamoedian gerakannja itoc pamoeda djadi semingkin kendor dan lelah, seloeroe toeboehnja penoeh keringet dan napasnya memboroe bahna sanget ketjapean.

„Ha ha ha, bangsat tjilik, apa kaoe masi brani adoe kiamsoet padakoe?” mendjengekin Siauw Tiang Tjhay sembari tertawa besar. „Soenggoe sajang, Yong Yong Tjoe poenja nama baek sadiek ratoesan taon, kena dibakin moesna oleh kaoe dalem sake-djepan!”

„Hajo lekas!” berseroeh lagi Siauw Tiang Tjhay tapi ditoedjoeken pada iapoenja kiamkong, dan ini sinar idjo sigra berubah djadi seperti oeler pandjang, sedeng gerakannja semingkin tjepeet dan gesit, menjerang teroes pada batok kapalanja Tjoe Siang.

Tjoe Siang djadi semingkin iboek dan koeatir, dengen kasoesoe ia djaga lagi itoe kiamkong sama goloknja, tapi ini kalih tida bisa menoeloeng, sebab berbareng dengen terdengernya soeara berkontrangan, itoe golok sapat doea, hingga Tjoe Siang mendjerit bahna kaget.....

(Aken disamboeng).